

奉節縣志卷二十二

武功

國朝名將挺生西蜀爲最金川盪平威信公岳
鍾琪彪炳一時矣教匪之亂時則有若忠武
侯楊遇春有若羅思舉有若桂涵胡超髮逆
蠢動時則有若向忠武榮張武壯必祿羅壯
勇玉斌虎忠壯坤元謝忠愍子澄張確愍萬
祿周忠壯天受張忠壯玉良楊忠勤鼎勳雷
提軍正綰皆名將也奉節鮑忠壯超晚出雄

奉節縣志

卷二十二

武功

一

勇膽略轉戰大江東南尤傑出焉記云君子
聽鼓鼙聲則思將帥臣有以哉志武功

順治三年肅親王入川討賊張獻忠被戮後
蜀中餘黨或稱四家或稱十三家袁韜武大
定及夔州譚文譚誼譚宏巫山劉體純鄴都
胡明道金城姚玉川施州衛王光興等最著
餘不可考總謂之十三家又李自成餘孽李
赤心竄死廣西子來亨代領其眾展轉川東
與十三家連結出入夔巫一帶地方五年

朝命李國英以僉都御史管四川巡撫事國英
破賊姚天動等於遂甯

十年及僞將劉文秀戰於保甯破其象陣大
敗之賊將譚宏譚誼殺譚文文黨劉體仁袁
宗第李來亨等分十六營將由水道襲重慶
國英聞之欲討宏誼二人懼率所部來降袁
宗第等遁走夔巫

康熙元年壬寅冬十二月

命李國英統領湖廣陝西河南四川四省官兵

會勦李來亨袁宗第等國英至夔府道路榛
莽伐木開道以進大兵奪羊耳山宗第遁入
深箐我師屯七里壩宗第屯茶園坪山勢陡
絕諸將攀籐而上宗第敗走巴東大兵追及
巫山遂據其城眾議移守夔門國英計巫山
地勢卑狹雖不便馳驟可利固守於是深溝
堅壘具炮石城下樹梅花椿賊至不得進椿
外挑品字坑又於城外高處立敵樓以防偵
探具甫備劉體純郝永忠合數萬眾攻巫山

甚急我兵出戰體純等敗走適陝西會勦兵
至陳家坡奪老木空體純自縊大兵乘勝追
至黃草坪永忠宗第皆授首惟李來亨居茅
麓山高險難攻我兵四面圍之來亨出入地
名通梁路徑陡絕我師乘大霧未開遂奪通
梁來亨力窮勢迫八月初六日焚其妻子自
縊茅麓山遂破餘眾馬騰雲拓天寶王光興
俱投誠李自成張獻忠二賊餘孽及十三家
賊至是誅滅殆盡總督李國英凱旋重慶全

川俱入版圖

康熙十三年甲寅吳三桂僞總督王公良率
僞將軍王鳳岐劉之衛等據夔州逾六年庚
申四川總督楊茂勳率師由楚江峽路逆流
而上破巫山揚帆直進抵夔州兵不血刃羣
逆遁去遂復夔州

嘉慶二年白蓮教之亂六月尙書總統惠齡
尾追其黨齊王氏姚之富入川與署廣州將
軍伯明亮署領侍衛內大臣德楞泰分道剿

之齊王氏等竄掠雲陽萬縣沿途教匪響應
奉節縣逆匪龔文玉與弟其位卜三聘陳待
俸稱線號賊據鐵瓦寺八月齊姚二賊首由
奉節東竄湖北明亮德楞泰惠齡將追入楚
屢戰於蓮花池白帝城巫山縣太原鎮總兵
德齡圍剿鐵瓦寺賊楚匪與大甯雲陽奉節
賊合提督劉君輔領鄉兵攜布囊夜攻賊巢
雲騎尉李寅攀石磴曲折而上賊濠密排竹
籤寅以袋盛土填之首跳過濠斫門入柵賊

格鬪左右擊殺刃傷數處與外委童國輔等
俱戰歿齊王氏等遂入楚留其黨王光祖樊
人傑從大甯趨太平一路與黃號賊龍紹周
白號羅其清藍號冉文儔等分擾東鄉太平
廣安岳池新甯奉節大甯雲陽萬縣等處夔
守周景福守備劉忠魁敗賊於樓子壩四年
三月都統德楞泰由大竹追賊至江口賊走
香坪桂壩官兵追至奉節之七里橋時黃號
賊首張漢潮由湖北至夜攻官軍營垂破而

天曉都統嚴隊而出賊駭奔逐之至大甯母
豬灣賊遁六月竄楚之賊徐天德忽自湖北
回川竊窺夔府營於蓮花池提督七十五總
兵朱射斗督兵勇往攻之賊大敗賊首王光
祖走死五年賊首趙昌應從大甯老林由香
坪桂壩一路勾合青號賊折回太平官兵冒
雨由江口渡河擊之值賊由寒池壩向大水
田竄至參贊德楞泰迎於溝內總督兵從右
山壓下賊覺奔馬鞍山倚險爲陣官兵乘未

奉節縣志

卷二十二

武功

五

成列突上山頂賊潰入箐林步兵何有富追
斬之餘黨走雲陽八年三月餘賊分竄各縣
崇化游擊馬明德雲騎尉李啟功崇甯外委
張榮陞戰歿奉節縣土門子後爲經略額勒
登保討平之

石香村戡靖
教匪述編

同治元年流賊李短瓣黨郭刀刀由大甯竄
入邑之鼓樓溝其時邑令楊澤溥與邑紳潘
煥樊啟善整飭團練晝夜防堵賊不敢犯繞
道竹園坪而去

守城護民取水附

志載九井八池其實無水居民皆取汲於江
唐杜少陵引水詩云亂石崢嶸俗無井雲安
涪水奴僕悲蓋言汲水之難也嘉慶二年教
匪犯縣界城門不啟民渴之謀避散邑紳樊
璫黎廷珖等集眾妥議稟明府縣請移劈山
大礮安置南門外左右翼列衛護居民取水
居民始無徙志知府張至軫邑令徐大椿咸
獎勵之

奉節縣志

卷二十二

武功

六

堅壁清野議

龔景瀚

竊惟邪匪滋事以來蔓延四省輾轉兩年處
處有賊處處需兵負固則經年累月不能克
奔竄則過都歷郡不能禦議者惟以兵少爲
辭於是調鄰省增新兵募鄉勇但謂以多爲
貴不知其無益而反有害也何則

國朝經制之兵本屬有限而腹裏尤少其重兵
所在非番回錯雜之區則形勢要害之地也
一調不已而至再再調不已而至三備禦空

虛奸民因而肆志是無事之區又將滋事卽如四川湖北之兵皆以全赴苗疆邪教遂乘機起事豈非明效大驗乎此調兵之害也倉卒募兵但取充數非市井無賴之人卽窮苦無聊之輩紀律不習技藝不精心志不齊膽氣不壯遇賊惟有烏獸散耳此增兵之害也鄉勇守護鄉里易得其力若以從征則非所願無室家妻子田廬墳墓之足繫其心也平居未受涓埃之恩臨難責以身命之報於勢

既有所難能而爲之長者素昔等夷本無上下之分與以虛名強相鈐制於心又有所不服故加恩則玩而驕執法則忿而散求其約束而整齊之者難矣其藉此爲利浮開名數冒領銀糧者又無論也至於臨陣旣未習乎戰鬪疑則易驚又各自爲步趨□則易亂卽或誘之以重利鼓之以大義而有勇無剛能戰而不能久鬩然而進亦鬩然而退耳此鄉勇之害也且兵勇多則糧餉廣糧餉廣則轉

運難

國家帑藏充盈殺賊安民雖千萬在所不計而民間之疲於輓輸困於差徭者不知凡幾矣文報有站糧運有台軍營之移徙使節之往來其夫馬不能不資於民力近地不足調之遠處州縣雖官爲給價值而例案所銷豈能敷用每縣夫數百名馬數百匹道途之費守候之費津貼之費司事者日食之費皆派之里下不肖生監又從而沾濡其中爲日旣久

民力竭矣官吏但顧考成一切以軍興法從事科斂督責民必不堪事變滋起或遇水旱之變將何以處之况夫將領不能約束兵丁所過甚於盜賊鄉勇從而效尤激而生變是所憂者不獨在邪匪也然使有濟於事僥倖成萬一之功亦不必過爲疑慮而自去年以來其情形大概可見矣四省之山層崖峭壁四面削立如城寨者所在多有其上有田有水賊若據之非數萬之眾不能攻取然周圍

百餘里或數十里終未能環而圍之也竭力
仰攻士卒損傷過半幸而得之賊已乘間率
眾他徙矣則又窮日夜之力以追之而其勢
常不相及蓋賊因糧於民無地非民則無地
非糧官兵之糧必須轉運賊竄無定向亦無
定期糧台豈能預設夫馬豈能預增倉卒移
營糧必貽悞此一難也賊皆輕身登降便捷
而我兵烏鎗弓箭火藥鉛彈身所佩帶不下
二三十觔行走不易此二難也賊皆本地之

人慣於山行婦人孺子亦趨捷若飛而我兵
如陝甘等處壯健有餘輕捷不足登山半日
汗流氣喘未遇賊而先困矣此三難也賊隨
時隨地可以休息而我兵行必按隊止必安
營挖壕樹柵守卡站牆日夜不得安歇此四
難也賊常飽而我兵常饑賊常逸而我兵常
勞勝負之勢已分矣幸而勝之所殺者賊之
後隊數十百人或其老弱疾病不能行者耳
其首逆卽全夥不可見也賊之詭計又分布

數人於左右十餘里中四面放火使我兵疑畏不敢遽進及至探明而賊蹤已遠矣此尾追所以常不及也於是有謂宜繞道前進迎頭截殺者究之亦係空言無實濟也前後夾擊則左右分馳東西並攻則南北各竄山澗重叠道路紛岐處處可通頭頭是道安所得十餘萬之兵分布於數百里之內其勢既分其力亦薄賊以全力捨命衝突亦未有不潰而出者故賊之往來可以自如我之進退反

不能自主賊合而我兵不得分賊分而我兵遂不能復合焚掠裹脇賊愈殺而愈多疾病死亡兵日添而日少勦則無以爲守守則無以爲勦城池已在在堪虞將領惟斤斤自保今日之賊無論非今日之兵所能蕝事卽或額兵全來新兵已練而使之追逐千里之餘奔馳半月之久力疲氣阻其勢又爲今兵之續賊勢益張兵氣益餒日延一日事恐不可問矣然則爲今之計將奈何曰賊未至巴

州而巴州之民先去賊夫至儀隴而儀隴之城已空守土之官雖欲効死勿去其誰與守此無他民心無所恃也故殺賊以安民也今必先安民然後殺賊民志固則賊勢衰使之無所裹脅多一民卽少一賊矣民居奠則賊食絕使之無所擄掠民存一日之糧卽賊少一日之食矣爲今之計必行堅壁清野之法責成地方官巡行鄉邑曉諭居民團練壯丁建立堡寨使百姓自相保聚併小村入大村

移平處就險處深溝高壘積穀繕兵移百姓所有積聚實於其中賊未至則力農貿易各安其生賊旣至則閉柵登陴相與爲守民有所恃而無恐自不至於逃亡矣別選精銳之兵二三千名以牽制賊勢不與爭鋒但尾其後賊攻則救賊退則追使之進不得戰退無所食不過旬餘非潰卽死耳不戰而屈人策之上者也其要必先擇良吏一省之中賢而能者道府豈無數人牧令豈無二十餘人其

奔走趨事明□勤幹者佐二豈無數十人今川省賊所往來者川東惟夔州一府達州一州川北惟保甯順慶二府而已陝西惟興安一府商州一州河南惟南陽一府湖北惟荊州宜昌施南襄陽鄖陽五府而已所屬牧令賢者留之不肖者易之每處各派佐雜數人分任其事以一道府董局事佐以正佐數員講明利弊議定章程總其大綱其餘道府分路經理稽查不過三月可以畢事矣其次則

相度形勢天成之險如大成寨太平寨等處者加卑因高使之可守移附近居民於其中先藏積穀貧者官貸其資茅屋草棚聽其自便其故居仍留勿毀賊未至時仍可照常安業也其村庄市鎮人煙湊集如臨江市普安場等處者隨其所居因山臨水爲築城堡外挖深壕務令高廣民零星在外者移入之磚石木料匠役之費皆給於官惟丁夫取於民有貧乏者量給口糧以代賑恤其次則選擇

頭人山上之寨平地之堡人戶既多一切事宜需人經理擇其身家殷實品行端方明白曉事者或紳監或者民舉爲寨長堡長給以頂戴予以鈐記使總一寨一堡之事其清查戶口董視工程經管銀糧稽查出入訓練丁壯修飭守備別擇數人爲之副各就所長分任其事以專責成其次則清查保甲戶口繁多奸良莫辨外至者虞其爲閒諜也卽久居者亦慮其有匪黨也行保甲之法十家聯保

互出甘結始准移居匪類送官究治其踪跡可疑尙無確據者另附冊尾聽其另居自便毋使溷入以滋後累其餘良民悉使圍聚家有幾人大小幾口所操何業田地若干詳註冊內以備稽查其次則訓練壯丁每戶抽壯丁一人或二三人編爲部伍烏鎗刀矛各習一技官爲給價製備器械每一堡寨擇營中千把或外委一員兵三四名使之教導勤加訓練有事則登陴守禦自保鄉里毋令出征

惟本州縣有警或隣堡告急許以其半救援其次則積貯糧穀堡寨之中建倉數間富家囤戶有糧難以盡移者官給銀悉行收買入倉無者買於隣近各鄉官兵經過卽以此糧供支賊至閉寨壯丁守陴按名給糧毋令家食其鰥寡孤獨貧乏殘疾及家稍充而實無糧者准其照冊分別賑借賊平之後卽爲本鄉社倉分貯常平一遇災歉亦可就近賑糶其次則籌度經費所有築堡挖壕建倉買糧

置備軍械一切守禦器具及搭蓬蓋屋之費銀皆官給交堡寨長司其出入惟倉糧之數主於官賑借供支官爲報銷其餘糧勻攤於堡寨居民所有田地分爲十年或八年隨地徵還如此者有十利焉川省無土著之民五方襍處其性輕於去就故一聞警報輒四散奔逃民心疑懼則千里無堅城矣今堡寨林立聲勢聯絡民居旣安民志自定父母妻子一家團聚無流連死亡之憂并不慮爲賊逼

脅陷於邪黨可以保全良民潛消賊勢其利一也糧皆藏於堡寨之內所餘村落店舖皆空屋耳賊卽千里焚掠無所得食若攻圍堡寨則丁壯自護身家其守必力又有隣堡之救援官兵之策應其力必不能攻陷狂奔十日非潰而四散則輾轉於溝壑之內而已區區首惡何難就擒可以制奔竄之賊其利二也據險之賊不能下山掠食今民皆圍聚糧不露處冬春之交野無青草附近已無所

掠遠出則近山之堡寨皆得邀而擊之其勢又不敢出坐困月餘積糧旣竭終亦歸於死亡逃散而已可以制負固之賊其利三也州縣之有鄉村如樹之有枝葉枝葉傷則根本無所庇鄉村皆爲賊所蹂躪其城郭之不去者僅矣今四面皆有堡寨障蔽擁護賊必不敢徑犯城郭有急則環而救之如手足之捍頭目賊將腹背受敵况官兵又乘其後乎可以保障州縣其利四也堡寨遠者相距數十

里近者或十餘里官兵經過就近供支糧臺可以不設官無轉運之費民無輓輸之勞至文報往來尤關緊要堡寨之在大路者卽安設夫馬遞送無須兵勇護之可以省臺站之費其利五也每省挑選精兵三千賊合亦合賊分亦分牽制其後使之不得攻陷城堡足矣其餘悉令歸伍所省鹽糧猶其小者也兵省則差徭亦省民受無窮之利而營伍不至空虛亦無虞再生他變其利六也守陴壯丁

惟賊至時數日給以口糧耳無按月之鹽糧無安家之銀兩也其費較招募鄉勇所省何啻天淵而愛護鄉里朝夕相見猶有古者守望相助之意可以情法維繫之不若鄉勇從征日久習於兇暴怯公戰而喜殺掠釀爲將來無窮之憂其利七也保伍時相糾察而堡寨之長又從而稽查之則奸宄無所容其桀驁不馴如嚙嚙者亦懾而不敢肆可以漸化爲良民其利八也邪教蔓延爲日旣久伏而

未動者正不乏人今淑慝既分居不相雜其冥頑者苟潛入於賊黨可以一併殲除其愧悔者必安居乎故業可以保全身命絕後患之萌開自新之路其利九也規模既定守而無失遠近一體上下同心如網之在綱有條不紊如身之使臂無令不從無事之時按籍而稽瞭如也有事之時畫地而守井如也一勞永逸數世賴之其利十也然而愚民可與樂成難以慮始因循目下畏難苟安此議一

出必有沮之者矣一則曰騷擾反以累民也夫擇利莫若重擇害莫若輕賊匪所過焚燒房屋殺戮人民擄掠婦女其慘極矣民雖至愚亦必明於利害所全者大卽小有騷擾猶當毅然爲之况保其身家全其積聚順其情之所樂何累之有若云奉行不善則官吏之過當易其人不當廢此法如戰場失利豈以偶無良將而遂永不用兵乎一則曰迂緩不切於事也夫欲速則不達自去歲以來所行

者何一不速何一有效事固有不急於目前而收功於異日者及今爲之未爲晚也行之一縣可保一縣行之一府可保一府同時並舉不過三月賊在網羅之內矣是速莫速於此也舍此以圖其果有旦夕奏効操券而得之策乎一則慮其費大也夫成大事者不惜小費苟能平賊卽多費亦所不惜今州縣大者不過堡寨數十處小者十餘處一省所辦不過三四十州縣耳裒多益寡合計每省不

過用銀一百萬兩而已自是卽無所費較之養兵養鄉勇每日需銀百萬者其費何如且尙未有底止也惟買糧爲費較鉅而糧分貯於堡寨何異貯於州縣之倉今各州縣豈能不採買乎其餘借項分年帶徵歸款是不獨省費且並無所費矣一則畏其繁難也夫天下無難成之事患無任事之人今自道府下至堡寨之長總理者有人分任者有人勞瘁不辭纖悉具舉何慮其繁難且通江巴州儀

隴賊所蹂躪之處失業難民豈能不爲撫恤
清查戶口修理房屋弔生恤死賑乏周貧其
繁難何止十倍於此與其補救於已然之後
何如豫備於未事之先願平心而熟計之也
是數說者皆不足以難之然則今日急計莫
有先於此者矣安民卽所以殺賊民懼賊而
逃猶可言也兵愈增則差徭愈重師愈久則
擾累益多數月之後恐民之見賊將不逃而
合之矣今不早爲後悔無及謹陳一得之愚

伏惟垂採幸甚

〔按〕白蓮教之亂蹂躪全蜀厥後盪平奈此議
之力爲多謹錄之